

LA
DECLARATION
DV DVC
CHARLES,
FAITE A NOSSEIGNEURS
DE
PARLEMENT
ET AUX BOVRGEOIS
DE PARIS, EN FAVEUR DE
LA FRANCE.



A PARIS,
Chez la veſue JEAN REMY, rue S. Iacques, à
l'Image S. Remy, près le College du Pleſſis.

M. DC. XLIX.
AVEC PERMISSION.

12

LA DECLARATION DV DVC CHARLES,
*faite à Nosseigneurs de Parlement, & aux Bourgeois
de Paris, en faueur de la France.*

L n'y a rien qui soit plus charmant pour attirer vne ame ambitieuse, que de luy promettre des dons immenses, immunitiez & prerogatiues: il n'y a acte d'injustice qu'elle ne commette, ny lâcheté où elle ne s'abandonne, l'honneur ne la touche point: ses plus fortes passions ne visent qu'à s'élever au debris & à la perte de son prochain, sa convoitise, aussi infame que mercenaire, captiue ses sens, & l'a fait tomber dans toute sorte de crimes: elle exile la Vertu, fait triompher les vices: son insolence s'étend par tout, & sa cruauté n'a point de bornes, les pleurs ny les larmes ne la peuuent fléchir, aussi on peut dire qu'elle est l'image d'Enfer: veu que cette maudite passion y tire son origine, elle a de puissans attraitz, veu que c'est vne magie, de laquelle plusieurs cœurs sont enforcelez. Iamais ie ne me suis laissé duper par ses blandices, ny flatter par ses carresses, ny emporter par ses promesses.

Et en cela i'en atteste la Cour d'Espagne, qui sçait que Mazarin m'a fait offre de deux millions & me remettre dans la possession de ma Duché de Lorraine,

3

pourueu que ie voulusse seconder ses desseins, qui sont de perdre la France, & saccager le plus vertueux, le plus sage pour sa conduite, & le plus équitable Senat de l'Vniuers, qui maintient la Monarchie, & que par ses deliberations, par ses soins & bons aduis, joint avec les armes fait des prodiges avec des succès dignes d'admiration; la Iustice est vne Vertu qui est d'autant plus noble que la force, que c'est elle qui l'a fait surgir à bon port: car à quoy seruiroit d'auoir vne force imaginable si elle n'est dirigée par la Iustice, qui luy donne le mouuement & l'adresse d'entreprendre par ses bons conseils, sinon la force sans Iustice est vn desordre, qui ne peut subsister, & qu'ainsi ne soit elle passeroit pour tyrannie.

Donc, la Iustice & Magistrature est plus noble que la force, aussi elle est diuinement instituée pour gouverner les peuples qui sont obligez en conscience, d'acquiescer à ses Loix, & subir à toutes ses Ordonnances.

Depuis le temps des baricades iusqu'à maintenant, i'ay esté sollicité par cet odieux Ministre, pour m'engager dans ces malheureux desseins, avec les promesses susdites, témoins l'Archiduc Leopold, auquel il a fait aussi de grandes promesses, & semblablement au Roy d'Espagne, luy voulant remettre toutes les places qui sont assuietties à la France par la force des armes, luy liurer des passages, moyennant que pour affermir sa fatale entreprise, luy seroit enuoyé vne armée: Mais ce grand & illustre Monarque, & ce Magnanime & vertueux Prince, l'ont rebuté, ne voulant

A ij

944.03

M475m

No. 897

824210

4

pas fauoriser vn ennemy si terrible & vn Estranger si criminel, pour perdre le plus glorieux & aymable Senat du Monde, & le Royaume le plus beny, les promesses & importunitéz tant de fois reiterées par ce mauuais Polityques, n'ont pas moins esté infructueuses en mon endroict, qu'à ces deux genereux Princes, auxquels il a si souuent trompé & proditoirement fait des laschetéz, & rendu complice de la ruyne de cette Monarchie Espagnole.

Nous aurions bien rauagé les frontieres de la France, & ampieter iusque dans son sein, nous seruans de cét occasion, ayans tiré les garnisons & le canon des Villes, au moyen dequoy nous pouuions passer librement sans aucune résistance, à la faueur d'un gros corps d'armée que nous auons: mais ce reproche ne nous sera iamais fait, que d'auoir trempé dans vn si mal-heureux attentat, & seruy d'une si pernicieule occasion que de ruiner la France, & perdre vne si noble Compagnie, composée de si Illustres Senateurs, qui portent la gloire de leur nom par toutes l'Europe: c'est à vous grands & heroïques Magistrats, qui estes l'ornement de la Iustice, la gloire de Paris & les Peres de la France; c'est à vous dis-je incomparable societé, à laquelle ie n'ay que des vœux de bien-veillance, vous protestant que mes armes ne se porteront iamais contre vous, ny contre la France, au contraire, ie vous les offres, ainsi qu'a fait les siennes le Roy tres-Catholique, ce sera d'un franc cœur que ie me porteray contre vostre ennemy, & afin que ne me teniez point pour suspect, ie donneray ostages vallables & suffi,

5

suffisant & fortifieray vostre party de quinze mil hommes & plus s'il est besoin.

Ce Critique & malicieux Mazarin, a fait courir le bruit (pour intimider les simples) que mon accord de pacification, & remise dans mon bien, estoit moyennant que mon armée se ioingneroit à ses armes pour satisfaire plus facilement à sa rage & passion contre ce fameux Parlement.

Non, non, ie veux que tout le monde sçache que j'aimerois mieux auoir perdu cent Duchez, que d'en posseder autant par vne lasche action comme celle-là, ie serois bien priué du sens commun, si j'embrassois le mauuais party de celuy qui est cause de la perte de mon bien, & qui par ses mauuais conseils enuers le Cardinal deffunt, a esté cause que ie ne m'ay pû reconcilier avec le Roy deffunt, ce sont esté par les ruses & intrigues de ce cauteleux estranger, qui ont diuertty mon accord avec la France: il a des-vny l'amitié que ie deuois auoir pour elle, & que ie deuois garder inuiolablement, estant annexée par proximité avec mon Duché, neantmoins ie n'ay aucun fiel pour elle, & si elle a conceu quelque haine contre moy, c'est vn effet, qui ne peut proceder que de l'industrie de cét ennemy, qui par de faux libels a fait courir le bruit que j'auois violé mes promesses faites au Roy deffunt, tant s'en faut ce fut luy qui donna aduis au Cardinal de Richelieu de n'effectuer sa parole: & ainsi Mazarin a continué ses inuentions ordinaires pour nourrir, les troubles & les guerres, en vn mot pour depouïller (ainsi qu'il a) la France de tout son bien & d'auoir le reuenu du mien.

B

C'est de vous, Messieurs, de qui j'attends iustice; vous estes deputez comme tres-sages & iudicieux, pour estre mes arbitres, ie me souismet à vostre iugement, vos consciences sont trop pures, pour m'estre defavorables, vous agirez avec les dénommez, avec esprit d'équité, ma cause vous est connue & plus visible que le Soleil.

Cependant ie ne puis trop louer vostre genereuse action: iamais le Ciel n'en pouuoit faire naistre vne plus glorieuse: ceux qui semblent estre ennemis des François en enuient la gloire, & voudroient participer à vn tel bon-heur; Vous immortalisez vostre illustre reputation par vn faict digne des louanges de la posterité, cette heureuse conjunction de la iustice avec les armes, ne peut assez trouuer de Panegiriques pour en exprimer l'excellence, veu que c'est pour la gloire de Dieu & pour le repos de son Peuple que vous agissez, c'est pour chasser cet oppresseur venu d'une terre qui n'est feconde qu'à produire des Tyrans.

Ie loue aussi les Bourgeois de la plus celebre ville du monde, du bon soin qu'ils apportent à seconder vos glorieux desseins par le moyen de leurs armes, ce sont vos bons promets qui les font agir, c'est sous vostre bonne conduite qu'ils portent l'estendart, & ce sera par le mouuement de vostre sage conduite, qu'ils auront vn tres-heureux succez. Ce cruel ennemy, enfant des pensées tristes comme la mort, de voir vne telle ville & vn si grand nombre de peuple bandée contre luy. Et ce qui luy iette d'auantage de confusion sur son visage, c'est qu'il voit que tous ses malefi-

7
ces & mauuaises procédures sont manifestées.

Toute la France se reioiuit à la veuë qu'elle a d'un triomphe qui luy est inéuitable, elle vous en aura, Messieurs, des obligations d'autant plus grandes, que sa misere vous a donné de compassion, & fait quitter vostre repos, pour vaquer à vne si heroïque entreprise.

Madame de Chevreuse m'a mandé qu'elle vouloit appuyer vostre party; ie ne puis m'empescher de dire qu'il y a de secretes inspirations & mouuemens qui semblent exciter mesme vn sexe le plus fragile, & faire renaistre le siecle des Amazones. Dieu est iuste & ne veut pas qu'un si insigne pillard demeure à impunir, & que si les hommes luy sont indulgens, que les femmes se rendent plus seueres & ne le laissent dans l'impunité.

Ie ne puis m'empescher de dire l'excès de la bonté de la France, d'auoir laissé si long-temps ce Tyran qui luy a osté tout son bien, pour subuenir au luxe de ses Nieces, a enrichir ses parens qui sont sortis de la lie de l'Italie, & à faire bastir à Rome des superbes Palais, & des sommes immenses, pour des emmeublemens, & pour faire venir en France vn grand nombre de Statuës, representans les Tyrans qui l'ont precedé; bref les millions qu'il a dissipez, l'excès de la table & de son train, c'est le sang du peuple qu'il a tiré comme vne Sangsue, & qui crie à present vengeance.

Ce cruel Mazarin est cause de la mort de plus de dix millions d'hommes depuis qu'il est en ce triste Climat, ma Duché a veu les effets de son carnage: il est

cause de la mort du Roy d'Angleterre, luy ayant rauy la liberté des passages, & au lieu d'auoir porté les armes du Roy pour empescher cette inhumanité Angloise, il les a portées contre les propres fujets du Roy & contre sa Monarchie: & partant cette illustre Compagnie a eu droit de le declarer son Ennemy & perturbateur du repos public; Si ces deprauez Anglois ont trempé leurs mains parricides dans le sang d'un Roy innocent, pourquoy les François ne se défendront-ils pas d'un infame Tyran?

Non, non Paris a trop de cœur, son interest & son salut l'y obligent, le Ciel & la terre veulent que ce Tiran perisse, afin que par sa perte l'on trouue son salut, tous les Royaumes y sont interessez, aussi s'il est besoin ils contribuëront de leurs forces: pour moy ie n'attend que l'ordre de ce glorieux Senat, que i'excuteray avec toute sorte de fidelité & d'affection; tous les Princes poussez d'un saint zele, ont les memes sentimens, aussi ils sont interessez.

I'ay enuoyé cette Declaration pour estre imprimée à Paris, afin que par la publication d'icelle le peuple sçache le desir que i'ay de le seruir en vne si bonne occasion.

R. N. F.